

Mien - Singx Lingh Mborqv Jaax Ging-Sou - SW Intro Scriptures

Lugaa 17:5 Gong-zoh mbuo mbuox Ziouv, "Tov bun yie mbuo sienx gauh henv deix oc."

Lomaa 10:17 Hnangv naaic, mienh sienx weic zuqc ninh mbuo haiz Giduc nyei doz. Ninh mbuo duqv haiz weic zuqc maaih mienh mingh zunh bun ninh mbuo muangx.

Lugaa 11:1 Maaih hnoi Yesu yiem norm dorngx daux gaux. Daux gaux liuz, maaih dauh ninh nyei sai-gorx gorngv mbuox ninh, "Ziouv aac, tov njaaux yie mbuo daux gaux hnangv Yo^han njaaux ninh nyei sai-gorx mbuo nor."

1 Ti^mo^tai 2:1-4 Hnangv naaiv, da'yietv yie kuinx meih oix zuqc tengx maanc mienh tov Tin-Hungh. Oix zuqc weic ninh mbuo daux gaux, joun Tin-Hungh, laengz zingh Tin-Hungh. 2 Yaac oix zuqc weic zuangx hungh diex caux yietc zungv zoux hlo gunv baeqc fingx wuov deix daux gaux, bun mbuo maiv maaih sic, taaix-baengh nyei yiem, ziouc haih longx-longx nyei zaangc Tin-Hungh, laanh yaac taaih laanh. 3 Hnangv naaiv daux gaux se longx nyei, yaac horpc mbuo nyei Njoux Ziouv Tin-Hungh. 4 Tin-Hungh oix maanc mienh duqv njoux yaac oix ninh mbuo hiuv duqv zien leiz.

Se^kaa^li^yaa 3:1,2 Ziouv aengx bun yie mangc buatc Yo^su^waa domh sai mienh souv jienv Ziouv nyei fin-mienh nyei nza'hmien. Saadaan yaac souv jienv Yo^su^waa nyei mbiaauc bung ga'hlen oix gox ninh. 2 Ziouv gorngv mbuox Saadaan, "Saadaan aah! Ziouv hatc meih aqv. Ziouv, dongh ginv Ye^lu^saa^lem wuov dauh, hatc meih aqv. Naaiv dauh mienh hnangv yiem douz-nzauc baeng cuotv daaih nyei yietc nqanx zaangh."

E^fe^so 6:12 Weic zuqc mbuo maiv caux baamh mienh mborqv jaax. Se caux yiem ndaamv-lungh zoux hlo nyei, maaih lingc maaih qaqv gunv naaiv hmuangx haic nyei baamh gen wuov deix, caux yietc zungv waaic haic nyei mienv mborqv jaax.

E^fe^so 6:10,11 Setv mueiz yie kuinx meih mbuo, meih mbuo oix zuqc kaux Ziouv Yesu yaac longc ninh nyei domh qaqv benx mienh henv mienh. 11 Oix zuqc zorqv Tin-Hungh bun nyei yietc zungv mborqv jaax nyei wuoqc ginc zorng jienv. Meih mbuo ziouc haih souv duqv wuonv, ngaengc jienv mienv nyei hungh guv guaix nyei za'eix.

E^fe^so 6:13-17 Weic naaiv oix zuqc zorqv Tin-Hungh bun daaih mborqv jaax nyei yietc zungv wuoqc ginc zorng jienv. Taux wuov norm orqv haic nyei hnoi meih mbuo ziouc haih caux wuov deix win-wangv doix-dekc. Zoux liuz

nyungc-nyungc meih mbuo corc haih yiem duqv wuonv nyei. 14 Hnangv naaic, souv wuonv maah! Longc zien leiz zoux houx-hlaang sai jienv jaaiv. Longc zoux horpc nyei jauv zoux hlieqv-jaapv buang jienv la'kuotv. 15 Yaac oix zuqc zanc-zanc liuc leiz ziangx zunh baengh orn nyei kuv fienx weic zoux heh daapc. 16 Maiv daan mbuoqc naaiv. Oix zuqc longc sienx fim zoux torngv-baaih nanv jienv ziouc haih mietc hiuang orqv wuov dahu maaih douz nyei forng-cang. 17 Oix zuqc longc njoux en zoux hlieqv-muoc ndongx jienv. Yaac nanv jienv Singx Lingh nyei nzuqc ndaauv, se dongh Tin-Hungh nyei waac.

Hipv^lu 4:12 Tin-Hungh nyei waac se nangh nyei, maaih qaqv nyei, gauh laic jiex yietc zungv i maengx laic nyei nzuqc ndaauv. Haih nzopv bieqc taux hnyouv caux lingh wuonh gapv nyei dorngx, mbungv-fim caux mbungv-daaux gapv nyei dorngx. Zungv haih siemv duqv mienh hnyouv nyunc zoux nyei caux hnyouv hnamv cuotv nyei sic.

Lugaa 4:8 Yesu aengx dau ninh, “Ging-Sou fiev jienv gorngv, ‘Oix zuqc baaix Ziouv, meih nyei Tin-Hungh, kungx oix zuqc zaangc ninh nduqc dahu hnangv.’”

E^fe^so 6:18 Oix zuqc kaux Singx Lingh zanc-zanc weic nyungc-nyungc jauv daux gaux tov Tin-Hungh. Weic naaiv oix zuqc ging jienv hnyouv daux gaux, maiv dungx guangc. Oix zuqc maiv dingh liouh nyei weic Tin-Hungh nyei zuangx mienh daux gaux.

1 Saa^mu^en 17:45-47 Ndaawitv yaac gorngv mbuox wuov dahu Fi^li^saa^die Mienh, “Meih nanv nzuqc ndaauv, nanv cang caux biu nyei cang daaih caux yie mborqv jaax, mv baac yie dengv Nernh Jiex nyei Ziouv nyei mbuox daaih, se I^saa^laa^en jun-baeng nyei Tin-Hungh, dongh meih ndouv wuov dahu. 46 Ih hnoi Ziouv oix zorqv meih jiu bun yiem yie nyei buoz-ndiev. Yie oix daix meih, hngaqv ndutv meih nyei m'nqorngv. Ih hnoi yie oix zorqv Fi^li^saa^die Mienh nyei jun-baeng nyei sei bun lungh zaangc nyei norqc caux lomc zaangc nyei hieh zoih nyanc, weic bun lungh ndiev mienh hiuv duqv yiem I^saa^laa^en gu'nyuoz maaih dahu Tin-Hungh. 47 Gapv zunv yiem naaiv nyei zuangx mienh ziouc hiuv duqv Ziouv maiv zeiz longc nzuqc ndaauv fai cang njoux mienh, weic zuqc mborqv naaiv nzunc jaax se Ziouv nyei sic. Ninh zungv oix zorqv meih mbuo yietc zungv jiu bun yiem yie mbuo nyei buoz-ndiev.”

Lugaa 10:17-20 Wuov deix cietv ziepc nyeic dahu sai-gorx a'hneiv nyei nzuonx daaih mbuox Yesu, “Ziouv aah! Yie mbuo longc meih nyei mbuox hatc mienv, mienv yaac muangx yie mbuo.” 18 Yesu mbuox ninh mbuo, “Yie buatc Saadaan yiem tin-dorngv ndortv njiec hnangv mba'lingc nor. 19

Muangx maah! Yie bun meih mbuo maaih hatc maaz caaiv duqv naang, caaiv duqv ziepc nyeic ndaangh, yaac hingh jiex wuov dauh win-wangv nyei yietc zungv qaqv, yaac maiv maaih haaix nyungc hoic meih mbuo. 20 Mv baac maiv dungx a'hneiv mienv muangx meih mbuo nyei waac. Oix zuqc a'hneiv meih mbuo nyei mbuox duqv fiev jienv yiem tin-dorng."

2 Ko^lin^to 10:3-5 Yie mbuo yiem baamh gen zeiz nyei, mv baac yie mbuo maiv longc baamh mienh nyei eix mborqv jaax. 4 Yie mbuo longc nyei wuoqc ginc se maiv zeiz baamh gen nyei wuoqc ginc, se Tin-Hungh henv haic nyei wuoqc ginc weic porx waaic win-wangv wuonv haic nyei dorngx. Se porx waaic mienh nzaeng nyei nyungc-nyungc jaav sic 5 caux ceng-hlo nyei nyungc-nyungc, dongh laanh jienv maiv bun mienh hiuv duqv Tin-Hungh nyei sic. Yiem hnyouv hnamv cuotv yietc zungv nyei za'eix yie mbuo oix hingh jiex bun guei Giduc nzengc.

2 Ti^mo^tai 1:7 Tin-Hungh ceix bun mbuo se maiv zeiz gamh nziex nyei hnyouv. Ninh bun mbuo nyei hnyouv maaih qaqv, bun mbuo hnamv mienh, yaac haih gunv duqv ganh.

Matv^taai 12:28,29 Yie kaux Tin-Hungh nyei Singx Lingh zunc mienv cuotv. Naaiv bun cing Tin-Hungh daaih yiem meih mbuo mbu'ndongx zoux Ziouv aqv. 29 "Hnangv haaix nor haih bieqc mienh henv mienh nyei biauv caangv ninh nyei ga'naaiv? Oix zuqc ndoh jienv wuov dauh mienh henv mienh ndaangc cingx daaih haih caangv duqv ninh nyei ga'naaiv.

E^fe^so 1:13 Meih mbuo haiz zien leiz nyei doz wuov zanc, dongh bun meih mbuo duqv njoux nyei kuv fienx, meih mbuo yaac sienx Giduc aqv. Tin-Hungh ziouc ei ninh laengz nyei waac bun Singx Lingh meih mbuo hnangv nqaapv jienv yienx nor, bun cing meih mbuo benx ninh nyei mienh.

Gong-Zoh 19:6 Baulo maan jienv ninh mbuo, Singx Lingh ziouc njiectaux ninh mbuo. Ninh mbuo gorngv cuotv ganh nyungc waac yaac douc Tin-Hungh nyei waac.

Maako 16:15-18 Yesu mbuox ninh mbuo, "Meih mbuo oix zuqc mingh gormx lungh ndiev zunh kuv fienx mbuox maanc mienh. 16 Haaix dauh sienx yaac jiex wuom nyei leiz, wuov dauh ziouc duqv njoux aqv. Haaix dauh maiv sienx, wuov dauh zuqc dingc zuiz. 17 Sienx nyei mienh yaac maaih Tin-Hungh nyei qaqv haih zoux duqv naaiv deix mbuoqc horng nyeli sic. Ninh mbuo dengv yie nyei mbuox haih zunc mienv cuotv, yaac haih gorngv ganh nyungc waac. 18 Se gorngv ninh mbuo nanv naang-doqc fai hopv ndie-laengc, yaac maiv hoic ninh mbuo. Ninh mbuo oix dorh buoz maan baengc mienh nyei sin, baengc ziouc longx mi'aqv."

1 Yo^han 1:9 Se gorngv mbuo nyiemc mbuo nyei zuiz, Tin-Hungh se ziepc

zuoqv nyei, baengh fim nyei, ziouc guangc mbuo nyei zuiz caux mbuo zoux
nyei yietc zungv waaic sic, fioux mbuo cing-nzengc daaih.

Cuotv I^yipv 20:5 Maiv dungx gueic njiect baaix naav deix miuc-fangx yaac
maiv dungx zaangc, weic zuqc yie, Ziouv, meih mbuo nyei Tin-Hungh,
nzaeng jienv meih mbuo. Yie oix dingc nzorng yie wuov deix mienh nyei
zuiz, dingc taux ninh mbuo nyei buo bieci doic zeiv-fun.

Singx Nzung 109:17 Ninh oix zioux, tov bun ninh zioux nyei waac ndortv zuqc
ninh ganh. Ninh maiv oix buang waac bun mienh, tov bun fuqv leih ninh go.

Domh Jien 16:16 Nde^li^laa hnoi jiex hnoi ceuv-faan hnoi ceuv-faan
jienv ninh yiem, taux
Saem^sanx youx gau oix daic haic aqv.

E^fe^so 4:26 Se gorngv "Meih mbuo qiez jiez, maiv dungx qiez jiez daaih
baamz zuiz." Yaac maiv dungx ziangh hnoi qiez jiez taux mba'hnoi ndortv.

Lomaa 14:12 Hnangv naaic, mbuo dauh dauh mienh zoux nyei yietc zungv oix
zuqc binh mengh mbuox Tin-Hungh.

1 Yo^han 2:23 Haaix dauh maiv nyiemc Dorn, wuov dauh yaac maiv maaih
Zaangc Diex. Haaix dauh nyiemc Dorn, wuov dauh yaac maaih Zaangc
Diex.

Yo^han 14:6 Yesu dau, "Yie se dongh mingh Zaangc Diex wuov diuh jauv,
yaac dongh zien leiz, yaac dongh ziangh maengc. Cuotv liuz kaux yie, maiv
maaih haaix dauh haih mingh duqv taux Zaangc Diex wuov.

Matv^taai 11:28-30 "Meih mbuo haaix dauh kouv hnangv nyiex ga'naaiv hniev,
gunv daaih yie naav. Yie oix bun meih mbuo hitv kuonx. 29 Zorqv yie nyei
ndiangx-gaaz gaaz jienv, zuotc yie nyei nyungc, weic zuqc yie hnyou
suonc, horh norh, meih mbuo ziouc duqv baengh orn. 30 Weic zuqc yie bun
meih mbuo wuov norm ndiangx-gaaz kuh gaaz nyei. Yie bun meih mbuo
nyiex nyei ga'naaiv yaac heng."

2 Ko^lin^to 6:2 Weic zuqc Tin-Hungh gorngv, "Yiem yie ceix en nyei ziangh
hoc, yie haiz meih mbuo nyei, yiem duqv njoux nyei hnoi, yie yaac tengx
meih mbuo mi'aqv." Muangx maah! Ih zanc se Tin-Hungh ceix en nyei
ziangh hoc. Ih hnoi se duqv njoux nyei hnoi. Baulo Nyei Naanc Zingh

Lomaa 10:13 Hnangv Ging-Sou gorngv nor, "Haaix dauh heuc Ziouv nyei
mbuox, wuov dauh duqv njoux aqv."